

四庫全書

子部

欽定四庫全書

藝文類聚卷十三

唐 歐陽詢 撰

帝王部三

魏武帝

魏文帝

吳大帝

晉武帝

晉元帝

晉成帝

晉康帝

晉穆帝

晉簡文帝

晉孝武帝

宋武帝

魏武帝

魏志曰太祖武皇帝沛國譙人諱操字孟德漢相曹叅之後也時曹騰為中常侍大長秋養子嵩嗣父嵩官至太尉太祖少機警有權數而任俠放蕩不治行業故世

人未之奇也唯梁國喬玄南陽何顓謂太祖曰天下將
亂非命世之才不能濟也能安之者其在君乎初桓帝
時有黃星見於楚宋之分遼東殷馗善天文言後五十
歲當有真人起於梁沛之間其鋒不可當也至是凡五
十年而公破袁紹天下莫敵矣

誅魏陳王曹植武帝誅曰於惟我王承運之衰神武震
發羣雄殄夷拯民于下登帝太微德美旦奭功越彭韋
九德光備萬國作師寢疾不興聖體長歸華夏飲淚黎

庶含悲神翳功顯身沉名飛敢揚聖德表之素旗乃作
誄曰於穆我王胄稷胤周賢聖是紹元懿允休先侯佐
漢實惟平陽功成績著德昭二皇民以寧一興詠有章
我王承統天姿時生年在志學謀過老成奮臂舊邦翻
身上京表與我王兵交若神張陳背誓傲帝虐民擁徒
百萬虎視朔濱我王赫怒戎車列陳武卒虓闐如雷如
震攬搶北掃舉不浹辰紹遂奔北河朔是賓振旅京室
帝嘉厥庸乃位丞相總攝三公光受上爵臨君魏邦九

錫昭備大路火龍玄監靈蔡探幽洞微下無偽情姦不
容非敦儉尚古不玩珠玉以身先下民以純樸聖性嚴
毅平修清一唯善是嘉靡疏靡昵怒過雷霆喜踰春日
萬國肅虔望風震慄既總庶政兼覽儒林躬著雅頌被
之瑟瑟茫茫四海我王康之微微漢嗣我王匡之羣桀
扇動我王服之喁喁黎庶我王育之光有天下萬國作
君虔奉本朝德美周文以寬克衆每征必舉四夷賓服
功踰聖武翼帝王世神武鷹揚左鉞右旄威凌伊呂年

踰耳順體愉忠肅乾乾庶事氣過方叔宜並南嶽君國
無窮如何不弔禍鍾聖躬棄離臣子背世長終兆民號
咷仰懇上穹既以約終令節不衰既即梓官躬御綴衣
璽不存身唯紼是荷明器無飾陶素是嘉既次西陵幽
閨啟路羣臣奉迎我王安厝窈窕玄宇三光不入潛闥
一扃尊靈永蟄聖上臨穴哀號靡及羣臣陪臨佇立以
泣去此昭昭於彼冥冥永棄兆民下君百靈千代萬乘
曷時復形

策文魏文帝為武帝策文曰痛神曜之幽潛哀鼎俎
之虛置舒皇德而詠思遂膈臆以莅事矧乃小子夙
遭不造煢煢在疚嗚呼皇考產我曷晚棄我曷早羣
臣子輔奪我哀願猥抑奔墓俯就權變卜葬既從大
隧既通漫漫長夜窈窈玄宮有晦無明曷有所窮鹵
簿既整三官駢羅前驅建旗方相執戈棄此宮庭陟
彼山阿

魏文帝

魏志曰文皇帝諱丕字子桓武帝太子也為五官中郎將嗣丞相為魏太子太祖崩繼位為丞相魏王延康元年受禪于漢為帝初帝自許昌南征諸軍兵並進孫權臨江拒守帝幸廣陵收城臨江觀兵戎卒十餘萬旌旗數百里

江表傳曰魏文帝出廣陵欲伐吳臨大江歎曰吳據洪流且多糧穀魏雖武騎千隊無所用之乃還

吳錄曰魏文帝至廣陵臨江觀兵見波濤洶湧歎曰此

固天之所以隔南北也遂歸

誄魏陳王曹植文帝誄曰天震地駭崩山隕霜陽精薄
景五緯錯行哀殊喪考思慕過唐擗踊郊野仰愬穹蒼
考諸先紀尋之哲言生若浮寄德貴長傳朝聞夕逝死
志所存皇雖殪沒天祿永延何以述德表之素旃何以
詠功宣之管絃乃作誄曰元光幽昧道究運遷乾迴歷
數簡聖授賢乃眷大行屬以黎元龍飛踐祚含契上玄
五行定紀改號革年明明赫赫授命自天風偃物化德

以禮宣詳惟聖質岐嶷幼齡研幾六典學不過庭潛心
無內抗志高明才秀藻朗如玉如瑩聽察無響視覩未
形其剛如金其勁如瓊如冰之潔如砥之平爵功無重
戮違無輕心鏡萬機鑒照下情宅土之中率民以漸道
義是圖弗營厥險六合通同齊契共檢導下以純民由
樸儉紉冕崇麗衡紃惟新尊肅禮容瞻之若神方牧妙
舉欽於恤民虎將荷節鎮彼四隣朱旗所勦九壤披震
疇克不若孰敢不臣懸旌海表萬里無塵回回凱風祁

祁甘雨稼惟歲豐登我稷黍家佩惠尹戶蒙慈父在位
七載九功仍舉將承太和絕跡三五宜作物師長為神
主壽終金石等筭東父如何奄忽摧身后土俾我煢煢
靡瞻靡顧嗟嗟皇穹胡寧忍予明鑒吉凶體達存亡深
垂典制申之嗣皇聖上虔奉是順是將乃啟玄宇基于
首陽擬跡穀林追堯纂唐合山同阪不樹不疆塗車藟
靈珠玉靡藏百神警侍賓于幽堂於是侯大隧之致功
陳元辰之淑禎潛華體於梓宮憑正殿於居靈悼晏駕

之既俟感容車之速征浮飛魂於輕霄就黃墟以藏形
背三光之昭晰歸窀穸之冥冥嗟一往之不返痛閔闔
之長扃

章魏陳王曹植慶文帝受禪章曰陛下以聖德龍飛順
天革命允荅神符誕作民主乃祖先后積德累仁世濟
其美以暨于先王王勤恤民隱劬勞戮力以除其害經
營四方不遑啟處是用隆茲福慶光啟于魏陛下承統
續戎前緒克廣德音綏靜內外紹先周之舊跡襲文武

之懿德保大定功海內為一豈不休哉又慶文帝受禪上禮章曰陛下以明聖之德受天顯命良辰即祚以臨天下洪化宣流洋溢宇內是以溥天率土莫不承風欣慶執贄奔走奉賀闕下况臣親體至戚懷觀踴躍

表魏文帝讓授禪表曰臣聞堯禪重華舉其克諧之德舜受文命采其齊聖之美猶下咨四岳上觀璇璣今臣德非虞夏行非二后而承歷數之詔應選授之命內自揆撫無德以稱且許由疋夫猶拒帝位善卷布衣而逆

虞詔臣雖鄙蔽敢忘守節

魏辛毗等勸進表曰古先聖王所以受天命而不辭者誠急於荅皇天之意副四海之望不得已也

魏桓階等勸進表曰臣等以為天命不可稽神器不可黷昔周武中流有白魚之應不待濟而大號以建舜受禪大麓桑陰未移而已陟帝位所以祇承天命者若此之速也故無固讓之義不以守節為貴必信於神靈而符合於天地也

吳大帝

吳志曰孫權字仲謀漢以孫策遠修貢職遣使者劉琬加錫命琬語人曰吾觀孫氏兄弟雖各才秀明達然皆祿祚不終唯中弟孝廉形貌奇偉骨體不恒有大貴之表又最壽策薨以事授權

江表傳曰堅為下邳丞時權生方頤大口目有精光堅異之以為貴象及堅亡策起事江東權常隨從性度弘朗仁而多斷好俠養士

吳歷曰曹公出濡須權數挑戰乃自乘船從濡口而入
公見舟船器仗徒伍整肅喟然歎曰生子當如孫權彼
劉景升子若狔犬耳

吳志曰孫權屈身忍辱任才尚計有勾踐之英奇人之
傑矣故能自擅江表鼎峙之業性嫌忌果於殺戮既於
末年彌以滋甚至於讒說殄行脣嗣廢斃豈所以貽厥
孫謀以燕翼子者哉其後葉陵遲遂致覆國未必不由
此也

誅晉陸機吳大帝誅曰我皇明明固天寔生體和二合
以察三精濯暉育慶懷詳載榮率性而和因心則靈厥
靈伊何克聖克仁茂對四象克配乾坤齊明日月考祥
鬼神誕自幼冲獻括宿照甄化無形探景絕曜巍巍聖
姿文武既俊有覺德徽兆民欣順將熙景命經營九圍
登跡岱宗班瑞舊圻上玄匪惠早零聖暉神廬既考史
臣獻貞龍輶啟殞霄載紫庭辰旒飛藻山旗舉銘崇華
熠爍翠蓋繁纓千乘結駟萬騎重營簫鼓振響和鑾流

聲動軫閭闔永背承明顯步萬官幽驅百靈隨化太素
即宮杳冥億兆同慕泣血如零

晉武帝

王隱晉書曰世祖武皇帝文帝太子也文帝初開晉國
立為世子拜撫軍大將軍嗣相國文帝崩魏帝命上為
相國晉王十一月受禪於魏有獻雉頭裘者上曰異服
奇伎典制所禁也因於殿前燒裘上與羊祜張華謀伐
吳朝士莫知也潜乃籌量虛實為戰備孫皓面縛輿櫬

降有司奏晉德隆茂光被四表吳會既平六合為一宜
勒封岳以彰聖德詔曰此盛德之事所宜未議

帝譜曰世祖武皇帝諱炎字安世

誄晉潘岳世祖武皇帝誄曰粵若稽古宣皇誕受休命
作我晉室赫赫文皇配天並日大行龍飛創制改物沉
恩汪濊流澤洋溢上齊七政下綏萬邦四門穆穆五典
克從惟清緝熙於變時雍愛盡事親教加百姓于喪過
哀在祭餘敬后蠶冕服躬籍采盛六代畢奏九功咸詠

行敦醇樸思貫玄妙莅政端位臨朝光曜胄子入學辟
雍宗禮國老恂恂貴遊濟濟莫孝匪子莫悌匪弟化自
外明訓法以禮獷彼吳楚稱亂三代世厯五偽年幾百
載遑陸虔劉王化阻闕羽檄星馳鉦鼓日戒帝御羣師
奉辭奪旅腹心庭爭爪牙疑沮天監獨照聖策乃舉朝
服濟江止戈曜武野無交兵役不淹月僭號歸命稽顙
晉闕邪界蠻流徇納百越表閭旌善德音爰發虞人獻
箴周書垂誥酒懼其彝獸戒其冒于我大行縱心所好

動不踰矩性與道與厭厭酣飲樂不辨顏桓桓振旅田
無遊盤我德如風民應如蘭靡不夙夜無敢宴安務農
望歲時或不稔小心翼翼恤民以甚御坐不怡撤膳賑
廩西流垂精南金抑拖永言孝思天經地義問誰贊事
英彥髦士問誰翼侍博物君子潛明神鑒從衆屈己道
濟羣生為而不恃先天弗違後天奉時萬物熙熙懷而
慕思顓顓縉紳不謀同辭巖巖岱宗想望翠旗恭惟大
行功成不居議寢封禪心栖冲虛策告不足太平有餘

七十二君方之蔑如思樂天德等壽嵩華如何寢疾背
世登遐遷幸梓宮孤我邦家龜筮既襲吉日惟良永指
太極寧神峻陽羣后擗踊長訣輶輅聖靈斯顧豈伊不
傷家無遠邇邦靡小大四海供職同軌畢會茫茫原野
亭亭素蓋縞輅解駕白虎弭旆龍輶即定玄闔載扁如
天斯崩如地斯傾哀哀庶寮禬禬自慙彼蒼者天胡寧
斯忍聖君不返我獨旋軫

哀策文晉張華武帝哀策文曰感大饗之無虧哀罇俎

之虛設叩龍轡以長叫痛靈暉之潛逝其辭曰欽惟皇
考體道之真德侔乾坤齊曜三辰應期登禪協于天人
上虔郊祀下惠兆民憲章唐虞允得其津搜揚仄陋故
老是賓百揆時序盛業日新恩從雲翔威猶霆震江海
靜波岷岳無塵四夷率服莫不來臣肅慎奉貢越裳効
珍化此弊俗歸之至淳昔在上聖咸享百年哀哀皇考
用不是臻遘厲彌侵景命殞顛舍此昭晰即彼幽玄仰
瞻靡怙廓若無天終制尚儉率由典度華幕弗陳罷必

陶素不封不樹所在惟固貽法來世是則是幕大隧既
啟吉日將征鍾鼓雷震白虎抗旌龍螭驤首良駟悲鳴
倡者振鐸挽夫齊聲背此崇殿將適下庭玄宮窈窕脩
夜冥冥光燈永戢幽闔長扃仰訴皇穹零淚屏營云誰
能忍寄之我情結心墳隴永憑聖靈

論晉干寶晉武革命論曰帝王之興必俟天命苟或代
謝非人事也文質異時興建不同故古之有天下者栢
皇栗陸以前為而不有應而不求執大象也義黃世及

以一民也堯舜內禪體文德也漢魏外禪順大名也湯
武革命應天人也高光爭伐定功業也各因其運而天
下隨時隨時之義大矣哉古者敬其事則命以始今帝
王受命而用其終豈人事乎其天意乎

晉元帝

晉中興書曰中宗元皇帝諱睿字景文世祖咸寧二年
生于洛陽初誕有神光之異一室盡明所籍藁如始刈
及長白毫生日角之左眼有精曜惟侍中譙國嵇紹少

而異之謂其友曰琅琊王毛骨非常殆非人臣之相惠
帝幸臨漳中宗從駕是時中宗叔父東安王繇為成都
王穎所害懼禍及謀出奔其夜月明禁衛甚嚴不能得
去有頃天暴風雨晦暝徼者四散中宗因得脫及遷鎮
建業以顧榮為軍司馬禮接名豪設官分職隱恤士庶
百姓歸心焉初性好酒王導深以為誡乃命左右進觴
躬引覆之自是不復飲也愍帝為胡賊劉粲所沒中宗
素服出次舉哀三日於是百僚稱上尊號帝固讓百僚

又固請中宗慨然流涕曰吾本琅琊王諸賢見逼不已乃呼私奴命駕將反國羣臣不敢復逼乃求依魏晉故事為晉王許之愍帝崩于平陽百僚更上尊號是日即皇帝位

晉陽秋曰太安中童謠曰五馬浮渡江一馬化為龍永嘉大亂王室淪覆唯琅琊西陽汝南南頓彭城五王獲濟至是中宗登祚先是五鐸見于晉陵靈數玄感若合符契

策文晉郭璞元皇帝哀策文曰永惟殿宇之廓寂悲羣
奠之莫歆感鸞輅之晏駕哀袞袞之委衿痛聖躬之遐
往長淪景於太陰乃作策曰王之不極百六作艱鴉集
瓊林鯨躍神淵懷愍失據海覆岳巔蠢蠢六合罔不倒
懸靈慶有底見龍在田誰其極哉我后先天大人承運
重明繼作撫征淮海駿命再廓仁風翊靡神化潛鑠處
冲思挹居簡行約聖敬日邁玄心逾漠用物與能總攬
羣略林無滯才山無遺錯恩靡不懷化靡不被茫茫海

域欵塞慕義萬里同塵因匪王諫熙熙遺黎莫知其寄
括終宇宙混同天地曰功永年曰德慶隆奈何氛厲奄
集聖躬大業未恢皇齡未中天惜其景崑頽其崇甄甄
小子藐藐孤冲靡天何戴靡地何憑恍惚極慕若存若
終蔑焉無聞廓焉長寂聆音靡晞瞻顏失覲窮號曷訴
叩心誰告何悲之哀何痛之酷嗚呼我皇逢天之戚嗚
呼哀哉眇然升遐即安玄室煌煌火龍赫赫朱韞終焉
永潛曷其有出明訓長絕小子何述望阜增欷臨崩慟

慄哀兼陟方痛過遏密靈爽安之反真復質永合元漢
終始得一

令晉元帝荅劉琨等令曰今方岳牧伯之任股肱腹心
之臣萬邦之內九服之外咸見翼戴以隆天威是用辭
不獲已而居王位尋覽所陳宏旨優遠孤方當匡復帝
祚豈可猥居極位昔有夏克復賴靡艾之勲周宣中興
由申邵之佐二公鎮御幽朔忠以衛上建功極難實憑
遠略夷難雪耻於是乎在

表晉劉琨勸進元帝表曰否泰之運古今迭有宗子有明德曷常不由多難以隆中興故獫狁殘周以啟宣王巨猾竊漢乃發光武陛下天授至德聰明神武勞謙恭已卑以自牧體伯禽經營之誠行公旦吐握之事上崇勤王之義下垂庇民之量收羅俊乂任賢以能綏爰陝東化流無外戎狄荒服請事率職重譯納貢不遠萬里功高德邵遐邇歸心況陛下道邁大宗勲莫與二且以親以賢義實兼之是以琨敢緣天文人事徵祥之應昧

死上事以奉尊號願陛下無常心以羣心為心忘其身
以萬物為公則宗廟蒸嘗不替於今逆虜逋寇一討而
滅無負於天下無愧於七后矣又表曰臣聞台宿在天
實承辰極股肱雖卑同體元首臣負乘前朝過充三吏
國之宗替有與憂喜臣聞德合兩儀者固以四海為公
智周萬物者不以一身為私舜禹揖讓以陟帝位湯武
征伐以濟時難彼四王者邁會不同登受有異至夫外
已存物憂世遺躬其致一也期於愛民治國應變合道

以為天下利而已矣況宗廟是陛下之宗廟百姓是大
晉之百姓耶陛下若忽七廟之重拒天人之心絕而不
繼困而不拯則宗廟不歆其禋祀羣生無所措其手足
矣況臣班具臣之列荷累世之恩上懷國家之統俯絕
烏鳥之情者哉昔伍員發怒手撻平王之墓灌夫慷慨
身搥吳淠之旗皆能宣其臣節據其私忿戮尸斬將存
亡罔恨臣誠無若人之才實有此人之憤苟得上憑天
威展其微效雖隕九泉猶以明白又表曰陛下之躬執

謙光允恭克讓俛從吏議示總萬機布曠蕩之詔開自
新之路海隅漸惠朔南暨聲有生之倫咸被嘉慶陛下
量包宇宙明侔三辰靈祗稽應華戎同戴加以王室中
微邦基將絕遺民元元屬命陛下陛下以德則無所與
讓言事固所負荷誠宜遺小禮存大務援據圖錄居正
宸極上副祖宗之心下一兆庶之望臣聞必也正名前
聖大之春秋傳曰名以出信名苟不正則事有不從信
苟不立則禮義或愆乃載籍之明誠開塞之所由也又

表曰臣聞天生蒸民樹之以君所以對越天地司牧黎元聖帝明王鑒其若此知天地不可以無饗故屈其身以奉之知黎元不可以無主故不得已而臨之社稷時難則戚藩定其傾郊廟或替則宗哲纂其祀所以弘振遐風式固萬世自元康已來艱禍繁興永嘉之際氛厲彌昏宸極失御登遐醜裔國家之危有若綴旒天不悔禍大灾荐臻國未亡難寇害尋興逆胡劉曜縱逸西都主上幽劫復沉虜庭神器流離再辱荒逆臣每覽史籍

觀之前載厄運之極古今未有在食土之毛舍氣之類
莫不叩心絕氣行號巷哭況臣荷寵二世位廁鼎司承
問震惶精爽飛越臣聞昏明迭用否泰相濟天命無改
歷數有歸或多難以固邦國或隱憂以啟聖明是以齊
有無知之禍而小白為五伯之長晉有驪姬之難而重
耳以主諸侯陛下玄德通於神明聖姿合於兩儀應命
世之期紹千載之運符瑞之表天人有徵中興之肇圖
識垂典自京畿殞喪九服崩離陛下撫寧江左奄有舊

吳柔服以德伐叛以刑抗明威以懾不類杖大順以肅
宇內純化既敷則率土宅心義風既暢則遐方企踵昔
少康之隆夏訓以為美談宣王之興周詩以為休詠况
茂勲格于皇天清暉光于四海蒼生顒然莫不欣戴聲
教所加願為臣妾者哉且宣皇之胤唯有陛下億兆攸
歸曾無與二天祚大晉必將有主主晉祀者非陛下而
誰是以邇無異言遠無異望謳歌者無不吟詠徽猷獄
訟者無不思于聖德天地之際既交華裔之情允洽一

角之獸連理之木以為休徵者蓋有百數冠帶之倫要
荒之衆不謀而同辭者動以萬計是以臣等敢考天地
之心因函夏之趣味死上尊號願陛下存舜禹至公之
情狹巢由矯抗之節以社稷為務不以小行為先以黔
首為憂不以克讓為事上以慰宗廟乃顧之懷下以釋
普天傾首之望臣聞尊位不可久虛萬機不可久曠虛
之一日則尊位以殆曠之決辰則萬機以亂陛下雖欲
逡巡其若宗廟何其若百姓何

晉成帝

晉中興書曰顯宗成皇帝諱衍字世根肅祖長子也即位後蘇峻及祖約阻兵作逆詔庾亮卞壺距之戰于青谿壺等敗績壺死之亮奔江州共陶侃溫嶠率衆下討峻臨陣斬之

策文晉成帝哀策文曰宸極寥廓聖靈遐之哀備物之虛在痛永往之無期乃命史官述德寄辭其辭曰五德代興素靈啟曜離光疊燿三辰重照明明我皇含貞挺

妙玄秀夙達履德罔違鳳棲遐邈神宇凝夷文明外潤
仁簡內綏舉無遺中鑒無幽微韻隆汾陽道作垂拱靜
恭清穆冥功日用亶亶神軌固天攸縱爰在陽九皇綱
中替姦豎肆逆牢羅失衛升降艱難協應神契靈祚既
保顯揚天命霧霧朝晞兩儀開鏡訓諮阿衡虛已納正
九功潛流七德將表方振宏羅稜威電掃芟蕩神衢一
我王道昊天不弔降茲大悔天傾其儀地覆其載大業
未究神爽遷背哀貫三靈痛流萬代爰初不豫大漸在

躬啟手歸全神氣夷冲凝哉達識體正履終袞龍既襲
玉容斯幽登醪虛設觴爵靡酬墳牘莫啟聖跡誰修冥
冥我皇神焉何遊撫膺遐叫迸涕交流三筮告期將歸
陵墟陞殞羽翼庭納龍輿玉輪動運錫鸞鳴衢錫旆徘
徊六驥踟躕輕雲蔭軌流風翼車哀哀同軌唯唯輓夫
長號永慕泣涕漣如大塊獨運終歸其始我后永往寧
神千祀悠悠上天甄甄惟已眇然靡憑廓焉無恃目範
令儀徽音在耳

晉康帝

晉中興書曰康皇帝諱岳字世同成皇帝崩上即位憂
哀不忍言政一委中書監庾冰

策文晉康帝哀策文曰感廣廈之空寂悲俎奠之虛陳
痛皇神之邈遠哀靈景之長泯仰瞻宸極俯憑鸞軒五
情摧裂號慟煩寃遂命國史述德銘勲事以言顯功以
名存其辭曰招拒降靈篤生我皇岐嶷妙哲幼有珪璋
含貞發曜蘭風載芳厥初肇建宗國是脣祗承師友執

心淑慎徽猷愷悌金質玉潤固天所啟應茲靈運入繼
皇祚龍騰鳳迅因假任物惟精委順穆穆我皇風流凝
廣聰鑒遐照思心內朗應變無方從善如響矩儀可慮
法物可象覆幬羣生靡物不養如何一旦神遊靈爽仰
攀擗踊觸物咸想卜吉有期將即玄冥太常既建千乘
列庭皓皓輿服翩翩素旌笳簫寥唌輓夫齊聲六驥躡
蹠蕭蕭悲鳴是用增哀雨泣霑纓痛貫五內哀切三情
道隆名貴德享彌光灼灼皇猷終焉允臧垂美兆祀芳

風休揚

晉穆帝

晉中興書曰孝宗穆皇帝諱聃字彭子康帝子也崩時
年十九

策文晉穆帝哀策文曰欽明文思允恭克讓忽若布衣
忘其矜尚體有示無德克神王冕旒兩楹委政元輔內
倚公旦外仗尚父郁哉惟文赫斯惟武西廓岷河北清
伊渚園陵聿修舊京式敘方振長慧風掃天宇休牛歸

馬卷旗卧鼓俾我烝民擊壤容與昊天不弔奄背率土
哀同遏密痛方割鉅日月不居神道之幽三辰吉良五
謀同休祖載華庭晏駕崇丘俯執饋奠仰攀龍輶岌岌
黼黻飄飄素旻感想平昔人懷崩抽號聲如震灑涕成
流

晉簡文帝

晉中興書曰太宗簡文帝諱昱字道方中宗少子也

晉陽秋曰桓溫始以雄盛入輔係以廢立帝雖登祚內

不自安初熒惑入太微尋廢海西公至是熒惑猶在太
微帝惡之謂郗超曰命之脩短大所不計故無復往日
事耶超云大司馬溫方內固社稷外布經略非常之事
臣以百口保之超假還東帝謂之曰致意尊公家國之
事遂至於此由吾不能以道匡樹思患豫防媿歎之深
言何能喻又誦庾闡詩云士痛朝危臣哀主辱泣下沾
衣漣如相續

續晉陽秋曰帝弱而惠異中宗深器焉及長美風姿好

清言舉心端詳器服簡素與劉惔王蒙等為布衣之遊
策文晉簡文帝哀策文曰同軌畢至內外成列素旗宿
懸輶輶首轍執祖行於前殿奉靈輿而遷逝悲神宇之
長違痛聖儀之幽翳攀龍輶以號慕撫素膺以泣血爰
命史臣敘述聖德揚徽音於飛旌寫哀心于翰墨乃作
策曰淳曜發暉皇厯攸膺聖祖啟運哲王遐承蒸哉元
后光我中興天基徙構朝陽再升皇矣聖考合一履中
道心玄玄文明內融湛湛神儀穆穆靈風望之凝秀即

之深冲爰在初齡至性自然水鏡一世堂室重玄惜惜
素庭翳若丘園遂阿王室婉跡經綸時有汙隆道無屈
伸如彼平流泯矣其津大過之時皇德不競天人革心
謳歌徒詠時惟伊霍輔運以政欽若昊天祇此明命龍
飛九五饗茲萬國居宗舉契允恭玄默綢繆哲輔虛已
仗德天明方曜離暉翳朗玄化誰陶蒼生曷仰四運忽
其遙邁日月飄以飛沉將寧神於玄宇遷玉輅於中林
背華殿之昭晰即幽隧之重深奉神觀以永訣邈終天

而莫尋神恍惚其若寄泣橫墜以流襟

晉孝武帝

晉中興書曰烈宗孝武皇帝諱昌明中宗第三子也

策文晉王珣孝武帝哀策曰同軌畢至百司胥亞法物
夕陳輻輳夙駕親執饋奠長號永夜懼鼓刻之遄盡哀
良辰之莫借悲宮宇之寥廓痛聖儀之幽化夫至德無
名固理絕稱謂然視史陳辭亦臣子所貴寄窮情於翰
墨庶遺塵之髣髴其辭曰惟皇作極五德迭膺康實復

夏武亦隆晉豐臺太宗希夷其韻鏡之者玄撫之者順
於穆皇考嗣徽絕軌前聖後哲契合一揆心去其伐行
遺其美廢華任誠捨筌存旨惟深通志羣方咸秩惟幾
成務能事斯畢未若我皇至則不疾恢恢天網疏而莫
失居有以虛宰多以少簡則可從易則不擾信及豚魚
澤被億兆湛然司契坐一八表園陵既衛威靈赫赫子
來既構寢廟奕奕武曰止戈戎不極役文教聿脩有耻
且格跡有遠邇感無高深道之所被改色革音皓獸馴

苑素羽棲林殊柯通理異蒂同根方融玄液陶鑄斯民
雲韶候奏比屋思淳積祐莫應天罰奄臻太山頽構洪
瀆竭津何殃之甚何酷之殷自罹旻凶二氣代變霜繁
廣除風迴高殿帷幙空張肴俎虛薦極聽無聞詳視罔
見人神道殊吉凶有禮龜筮叅謀埏隧告啟史臣考古
警者在陞攀援忪忪惟兄及弟龍輿肅以引邁前驪紛
以抗旒城闕儼以整列馳道亘以通修感平昔之所幸
豈斯路之復由輓哀唱以翼衡駟悲鳴而顧輶違華宇

之晰晰即永夜之悠悠奉靈觀而長訣緬終天而莫收
訢穹蒼以叫踊洞五內其若抽儻性命之可贖甘人百
於山丘茫茫大運靡始不終括王遺世貴在道融昭哉
我皇萬代流風良史式述德音永隆

宋武帝

徐爰宋書曰武皇帝彭城縣綏興里人夜生有神光之
異室內盡明是夕甘露降于墓樹少嘗遊下邳遇一沙
門于逆旅舍沙門言及中原多故因云江表尋復喪亂

能拯之者其惟君乎其意甚切至初高祖患手創積年未瘳沙門因出懷中黃散一裹留之沙門既去高祖追而望之倏忽不見以散治創一傳而愈餘散寶錄之每被金創輒用有驗高祖舉目瞻睃常見二龍在焉始尚微小及貴龍形漸長光色轉明左右侍者亦數見徵異晉陵人韋藪少以占相為事其言多驗嘗相高祖曰君當位至方伯久之又曰君相轉進貴不可言唯願富貴無相忘高祖北征至洛陽常有紫雲見於軍上

沈約宋書曰帝諱裕字德興小字寄奴初為冠軍孫無終司馬桓玄篡帝位遷天子於潯陽桓修入朝高祖從至京邑玄見高祖語司徒王謐曰昨見劉裕風骨不恒蓋人傑也上清簡寡欲嚴整有法度未嘗視珠玉輿馬之飾後庭無絲竹之音寧州嘗獻琥珀枕光色甚麗將北征以琥珀治金創上大悅命擣碎分賜諸將平關中得姚興從女有盛寵以之廢事謝晦諫即時遣出宋臺建有司奏東西堂施局脚牀銀塗釘上不許使用直脚釘用

鐵孝武帝大明中壞上所居陰室其處起玉燭殿與羣臣觀之牀頭有土障壁上挂葛燈籠麻繩拂侍中袁顗盛稱上儉素之德故能光有天下克成大業者焉

誄宋謝靈運武帝誄曰九有同悲四海等哀矧伊下臣思戀徘徊敢遵前典式述聖徽乃作詩曰舜潛厯巖高晦泗渚龍德而隱風積乃舉皇之遁世屯難方阻眷此區寰閔爾淪胥太元之季權戚携薄隆安之初主相蒙弱嶽牧糾虔朝廷紛錯妖橫乘隙蛟噴鯨躍既擾輿區

遂斥帝屋亂離斯瘼不後不先實賴明哲授手康旃紀
度廼薄餘分成閏舊晉中微偽楚籍釁躡彼潛機整此
英陣推亡必朽固存斯振廬循負險肆慝遐嶺殄我江
豫迫我臺省民既搖蕩國將遷鼎來騶歸轅式固皇境
宏危濟險弭難釋殆虎騎驚隰舟師漲海傾穴尋窠窮
幽測昧昔去洛汭息肩江沚世更十君年踰百祀國絕
興復家成桑梓荒默莫恤顏國誰耻夏典載禹九道是
行商詔述湯蕪攻是井勤彼周流協此經營仗鉞伐鼓

赫赫明明乃勅衆師竟執戎昭誨以三略惠以六韜雲
撤周京席卷秦郊復禮前塋雪愧舊朝既清西關將旋
東道中憇徐豫兼應燕趙業盛曩代惠侔大造澤及四
海功格八表悠悠聲教綿綿川陸北獻氈裘南貢金竹
鬋首冠弁穿胸歛服寒穴欣日巢栖玩屋匪惟遐譚靈
物偕就孰是人事自天所祐甘露芝草祥雲瑞宿嘉禾
連木素鳥皓獸昔之所感謳頌同音今之所應幽顯一
心宋克虞德晉猶唐欽曰總八紘于茲三齡四維開張

九流昭明敦儉務素欽賢愛萌制規作訓闡校修經禮
樂已甄雲雨未宏將陟井陘薄掃白登北朔渴望飛旌
衡軺東岱靈遲玉牒金滕天地不仁蒼生寡福已荷一
遇棄我何速梁顛太顏甘殞以贖同軌畢至率土咸哀
殊方均服藥藥素練灑淚成雨響呌如雷史臣考卜高
山開基貞龜無遠遷靈有期嗣皇擗標羣后崩悲孰云
不戚痛百在茲惟祖之夕流火始變秋月未永飛漏急
箭鳴簫哀噉金觴虛奠列駕長隧發輦華殿華殿既謝

長隧是幸雙蓋躊躇六閑引領攀援容貌眷戀俄頃哀
哀百僚長辭含鯁奉教百朝執鞭王始從履五牧年厯
十祀天光下濟謬蒙眷齒愧微刀筆頗預遊止垂幕侍
講接筵食理修曙朗夕登臺泛沼匪月匪日無晏無早
如何一旦緬邈穹昊徽容未遠聖靈超然收淚即路含
戚何言風霜蕭瑟山海蒼茫地苦情矜節速心傷孰是
幽哀實戀我皇情思如環萱蘇豈忘

議宋顏延之武帝謚議曰以為聖哲同風功美殊稱蓋

出乎道者無方故刑于物者不一伏惟道塞人神信通
期運愛敬所稟因心則遠英粹之照正性自天體苞潛
躍慮周卷舒龍德在陰雖艱貞而不悶因時而惕故有
來其必亨在晉之季皇塗荐阻欃槍干紀玼璣失馭天
鑒靈武民屬聖明不假十室之資不籍百乘之賦首義
馳風一鼓靜亂滌除泰階消殞薄蝕斯亮登庸之基經
綸之始者也內難雖弭外圖未輯河華海岱負固相望
荆濮燕亳侯服交侵眷言帝畿思康王路戎不再駕遺

珉即序斥堠之所未羈亭徼之所不譯莫不飾誠請罪
款塞來賓故能洒掃中嶽致廟九山神道會昌寶命既
集損之而益後身愈先既而儀形帝載揖讓天厯改玉
乎文祖班瑞于神宗貫革寢機文武措笏故居兩楹
坐一公表國訓成均之學家沾撫辜之仁大美配天必
終之以儉德道固萬葉猶申之以話言允所謂教思無
窮樹之長世取高上代顧邈前王矣

宋孝武帝

沈約宋書曰帝諱駿字休龍小字道民文帝第三子也
元凶弒逆舉義兵克定京邑乃踐帝位年三十五崩在
位八年

策文宋謝莊孝武帝哀策文曰應門洞望馳道南除敢
塗已撤鬱鬯將虛哀子嗣皇帝擗標池綍周遑旌軫攀
七緯之崩淪慟三靈之徂盡百神慕而行雲沉萬國哀
而素霜實衣冠緬邈弓劍不追敢諝謳頌髣髴希夷其
辭曰樞電皇根月瑤國緒脣裔丹陵蟬聯華渚二后在

天行纂武克睿克聖重規襲矩昭昭金式明明玉溫
望雲其遠就日其尊雨零露湛冬暖春暄聲芳納麓道
昭賓門上德無稱至功不器怡悵四始優遊六位綴響
蘭深緝言瓊秘悠哉梁踐眇焉汾肆敬業開寓離經作
翰鴻起荆河鸞遊楚漢泗濱霑明江區承負陝左清郊
崇陰虛館地維不紐乾綱弛機義庭薄蝕紫路流飛泣
血派涖顧瞻川沂孝貫樞極義震寰圍誓鉞皇郊詔師
牧甸七景締華五雲卷煽雪怨園邑掃耻瀛縣啟聖宸

蓋集寶龍見王室多故國步方蹇淮濟裂冠江荆毀冕
東楚亂常西華汨興動算揮圖爰戡爰剪浹宙斯澄綿
區咸鏡修風曉逸德星夕映溽露飛甘舒雲結慶禎被
動植信汨翔泳缺禮克宣墜章必構方堂饗極圓流肆
胃南聳郊宮北清靈囿瑶軒春藉翠華冬狩經緯窮文
克定盡武鄙上呈祥介丘載佇在盈念亢成功弗處榮
鏡中世鳥奕前古睿業初遠鴻化方亭丹雲承日素景
騰星玉几去襲綴衣在庭辭重陽之昭昭降大夜之冥

冥氣質炎涼史詔龜筮文物空嚴鑒和虛衛動蜃輅之
逶迤顧壁羽之容裔出國門分天地向幽途異身世龍
旌鬱而青槐遠驚葭亂而白楊翳觀初霜之變條聽秋
風之下帶橋山絙雲穀秋虧日輦道結寒松庭盡密芝
蓋迫軫上驤眷轡萬寓肅其北轆靈阿聞其深隘南維
有時傾離光不常鏡騰英聲與茂實方流華於舞詠

藝文類聚卷十三

欽定四庫全書

子部

藝文類聚卷十四至十六

詳校官中書_臣李彤

員外郎_臣牛稔文覆勘

總校官知縣_臣楊懋珩

校對官中書_臣李奎

謄錄監生_臣任楫文

欽定四庫全書

藝文類聚卷十四

唐 歐陽詢 撰

帝王部四

齊高帝

齊武帝

齊明帝

梁武帝

北齊文皇帝

陳武帝

陳文帝

齊高帝

齊書曰高帝諱道成字紹伯蘭陵人受禪于宋在位四

年

哀策文齊王儉高帝哀策文曰降階執禮泣血纏心感

客臺之罷御哀恭館之不臨仰神儀而邈絕視區物
而懷陰俾茲良史敬修舊則敢圖鴻規式揚至德其
辭曰靈源遙裔肇惟商丘聖功寧夏賢識歸周我皇
踵武超冠前猷英風允迪德音孔修月准敷仁日精
表孝則地均和體天合照外宏三至內隆七教水祀
將傾乾維晦象韋弁長襲鼓磬屬響聲化已淪政刑
遂往國圖靡緝民規載奕康世以德撥亂資武威以
雷霆潤以風雨六術允昭四義克舉自東徂北遐方

即序功被河濟化隆江漢帝謦仰式王維佇幹改步
藩屏來登翼贊綢繆總章因循陽館昔在保衡君違
斯正爰茲博陸亦鑒靈命放昏以忠登明資敬義煥
金石功昭舞詠蠢爾荆漢悖亂人經謀連樞禁兵接
神垌禦奸以德禦宄以刑獻捷宗寢飲至王庭政教
雲行徽猷天造山鑑紫璇苑茂朱草玉檢騰暉金繩
薦寶天鏡既穆地維既肅遐邇壹體表裏禔福乃眷
斯民昧旦抒軸興文偃武績禹舊服所尚惟簡所保

惟賢居尊彌約無善不延膠庠載緝風軌克宣上洞
清儀下達玄泉聽覽閒日應物餘景怡慮以文棲心
以靜鴻章晨暎徽言夕永迹疵區服情深箕穎萬寓
殮和百神受職梁甫欣儀示亭望式輔德伊何奄捐
民極嵩岳長傾宸暉斯旻機照惟寂達鑒靡傷慎終
敬始知微知彰立言垂範玉潤金相瞻仰遺式哀結流
霜旋玉軼之瞰鏡動雲旗之逶迤振哀笳於八極響清
蹕於咸池顧應掖而稍遠視機衡而長離風遲遲而懷

暮日惜惜其若垂感衣冠於喬岳追弓劍之在斯悼丁
年之薄祐訴窮心於兩儀

表梁江淹齊高帝讓禪表曰陛下遠視唐虞永揖之典
近摹漢魏高謝之禮既鑒金水昏明之數又協雲雷興
替之徵若乃與能之交禪錫之會豈伊盧薄所可遵擬
昔傳巖佐商秩終上公礚谿翼周名極列伯臣才非半
古功愧逮聖獄訟不往謳歌寧歸河乏馬圖之寶天無
乘龍之錫伏願陛下遺舜禹之心俾臣守巢由之節則

道曜日月澤浸飛泳

齊武帝

齊書曰武帝諱績字宣遠在位十一年

議梁沈約齊武帝謚議曰臣聞天德平分而四時之名
或異聖功一揆而皇王之稱不同蓋跡因隨事名由義
立堯臣禹佐咸率茲典伏惟盡寂窮微含神獨照德茂
始裳之主道冠初耜之君含精靈於五緯駕貞明於三
象初九勿用英氣凌雲負揭日月仰揚霄漢龍姿鳳采

煥若麗天登庸在試盛績雲舉雖屈景潢汙降情尺木
而拯世濟民浚發懷抱昔成湯百家仁被比屋文王十
里化先寡妻前聖後賢重規沓矩震雄圖於九江播靈
威於夏汭旌旆未麾鯨鯢自殞弗勞羗焚之長無待六
事之人義等伐謀功高善陣建有國之符成定鼎之業
會朝清明事資於牧野受命作周非止於西伯視膳寢
門孝德光備守器宗祧元良載遠嗣大寶以君百辟敷
景化以致隆平守在四夷威行海內圉圉寂寞禮讓交

興八柄馭下九官咸事臨朝凝默尊嚴若神風行日烜
無思不暢至仁與造化爭流靈威與雷霆齊軌上貫蒼
昊下洞深泉春無淒風夏無苦雨時若罔愆多稔如積
三革不累五刃不砥庠塾大啟儒雅雲集訓閱得宜蒐
狩有序丹徼青丘之野跂踵反舌之民浮深駕阻廻首
革面北夷畏力獻琛內款不藉終軍之使無假絕漠之
威嘉祥霧合秘瑞泉涌史不輟文簡無虛日方當垂七
曜之旗駕八龍之乘望禮中嶽肆覲羣后造化不仁穆

卜愆應慕切遺弓哀同過密晦朔不居殯宮將啟勒茲
大名宜盡徽極

齊明帝

齊書曰明帝諱鸞字景栖在位五年

哀策文梁沈約齊明帝哀策文曰龍鼓既徹備物已陳
殯宮無夜夕燎終晨號環輶幄攀標應路容衛弗改軒
檻如故望東川而不追仰昊天而自訴列聖同軌謚法
樹聲爰詔掌牘式播遺英其辭曰五曜在天逋作民主

赫矣帝高蒸哉嗣武多難固業隱憂啟聖時惟我皇功
符受命爰始濡足坐運機深鵬逝風舉龍動雲陰之郢
南沂即豫西臨體茲大德懷此小心賓于四門四門穆
穆納于百揆百揆肅肅德浸董荼仁被比屋何遠何邇
無思不服嗣君喪道不式典謨神器業業事等瞻烏民
懷輿主后來其蘇皇天眷命授以錄圖臨朝凝睟昧旦
不顯斟酌前王擇其令典不言斯應不行斯踐路臺靡
營離宮弗宴眷言膠塾宏啟上庠軌儀四代祖述三王

德暉內動英華外揚禮行罇俎義及幽荒仰荷天德降
年永久北極齊光南山獻壽滄溟奄竭嵩岱皆朽沴非
昊穹惟余之咎攀龍詎幾大隧玄玄厭世崇陞即宮下
泉殯階已遽素幕高褰端闈洞啟蜃紉徐前背朱闕以
南轉乘翠龍而東度經原野之荒涼屬西成之云暮伐
金鼓以清道揚悲笳而啓路極厚地而不追終蒼天而
永慕蒼梧晦遠杳微不泯紀事寂寞龜書可循哲王違
世克播遺塵猗歟萬古暉光日新

謚策文齊謝朓明皇帝謚策文曰仰惟早棄萬邦聖列
方遠式遵帝世俾它鴻猷咸以為無名以化則言繫莫
宣其道有來斯應則影響庶圖其功所以永言配命寄
心宗極光昭令德允樹風聲伏惟合信四時齊光日月
創保大於登庸通機神於受命因時以惕藉九萬而輕
舉天保既定運四海而高臨及開物成務重維國紐風
行草偃化往如神左賢右戚內樂外禮輯五材以教民
申三驅而在宥用能盛德殷薦美善斯畢皇矣之業既

孚蒸哉之道咸備景化方遠厭世在天龜筮告期遠日
無改仰則前王俯詢百辟累德彌濬允極鴻名

議梁沈約齊明帝謚議曰臣聞君德靡二辟王之名不
一聖功無爽堯禹之稱或殊兼以拯世寧亂致平未必
同道崇墀增祧嘉號不可相襲伏惟自天誕濬英聖在
躬皇矣之符夙著蒸哉之謠早集賓門納揆天平地成
自南自北無思不韙在屬負圖導揚末命值嗣主狂凶
人倫道盡宗社貼危瞻烏靡託國難立長亂極治刑四

海樂推三靈以眷東向而讓天下功高代入流涕而膺
寶位如就重負日昃勞躬親庶事撫辜納隍之念義
同於罪已振民厚下之情無廢於終食聰明神武逖聽
邇聞萬目備張絃綱靡漏御轡不迷寧藉聽於襄野大
川可濟不待備於舟楫崢嶸之下澤靡不懷寥廓之上
明無不燭包以宇宙潤以風雨霜露所交人跡所至百
姓仰之而不知其始萬物用之而罔識其終上庠廢業
忽焉已久三載弗為淪弛將及臨朝引領思隆雅訓貴

遊胥萃俊造成羣方將驅世反本既仁且壽告成東嶽
高宴汾陽造化不仁厭世云及放勛之慕不追負鄉之
思空遠殞宮將撤輜軫難留英聲茂實於是乎在

梁任昉齊明帝謚議曰以為窮神之跡無繼於成名教
思所宗言歸於有稱是以則天為大義盡於翼善武功
受命理貫於斯文伏惟功高五讓道冠三極愛敬始於
揚名孝饗終乎嚴配寥廓大度誕君人之符閨庭小節
應軌物之訓歷試允諧納揆時序貽厥之寄義均負圖

棖棟惟新歷焉將及於是承制宣德定策公卿登嗣后
於西鍾反獨夫於侯服既而主幼時艱仍離屯蹇應當
璧之祥注息肩之願立德以長紹開中興擬度天行取
則乾健日昃罷朝幽枉必達官曹寂寞園犴空虛虎門
肆義大足協律巖廊有縉紳之談鄉塾無橫議之士既
富而教弘此孝治遂使家無蕩子野有栖畝寘天下於
掌握覽八荒於戶牖寵微金穴之家恩絕椒風之館天
應民和祥符總暨故能上變雲物下漏深泉若乃青丘

丹陵之國黃銀紫玉之瑞幽符遠萃詢德報功方將馳
道日觀清宮鳴澤為而不恃高揖成功百川所以朝宗
參辰於焉取正豈所謂中衢均奠懸衡共軌者歟

表齊謝朓為百官勸進齊明帝表曰臣聞時乘在御必
待先天之業神化為皇乃叶應期之運况復湯孫有緒
纂堯惟德舊邦佇新復禹歸社大齊之權輿寶厯孕育
前古昭假四海克酬三靈而嗣命疾威蕃鄙叛換委裘
御寓彛鼎如忽陛下文思體道徇齊作聖剪應龍於冀

州戮長蛇於沮水榮光之瑞昭回近喜之寶潤色天睠
爰發人謀咸贊伏願陛下仰荅靈祇弘宣景命誕受多
方奄宅萬國

啟梁沈約賀齊明帝登祚啟曰竊惟皇源浚遠帝寶連
暉基深慶厚道貫萬葉而鬱林凶德早樹行悖人經遯
聽之所未書宗廟之殆如綴百靈聳動九服迴遑結后
來之望思庇民之主日月以冀遐邇翹心伏惟陛下大
聖在躬君德夙表龍章日綵煥若麗天納麓賓門道風

遐被眷化神行無思不洽獄訟允歸天人戴仰屈飛龍
之眇轡紆汾陽之遠情運堯心以臨億兆敷舜烈以膺
寶命雖中宗之興殷道宣后之隆漢德異世同符千載
一揆刑措之業方遠隆平之基在焉率土含欣懷生戴
賴况臣早蒙覆潤夙荷恩靈踊躍外畿心不勝慶謹綰
民和式流星澤塗歌里林戴懷鳧藻

梁武帝

梁書曰武帝諱衍字叔達蘭陵人受禪于齊在位四十

九年

議梁元帝高祖武皇帝謚議曰臣聞翼善傳聖曰堯仁
聖盛明曰舜受禪成功曰禹除虐去殘曰湯謚者行之
跡號者功之表雖賤不誅貴卑不誅尊而彰乎名者盛
德之嘉號也被於物者治定之實錄也斯所以聲明煥
乎鍾石昭晰備於絃管者焉伏惟天縱欽明惟睿作聖
功超三五聲踰七十仰之彌高就之彌遠載潛載躍乃
武乃文先是木運告終羣后改屬乾維罔構地紐如崩

桃祀沾危公卿肝食九牧有淪胥之悲八表興橫流之
歎乃凝威黑水表瑞丹陵雲合景從表裏禔福受終文
祖允恭克讓知黔首不可以無歸蒼生不可以無主降
汾陽之遠志不得已而臨之於是類帝裡宗革命創制
禘郊式展殷薦斯潔臨茲大寶化與和氣俱宣扇此王
風政與秋霜並肅言懸日月功格區宇不以紫宸為貴
不以黃屋為尊政謚刑措民殷國阜虹旌式卷堡燧載
清胥象相因環楮無曠天衢亭泰王道升平南海候風

東溟奉貢膏露凝枝慶雲觸石山開蒼壁地出玄珪驃
騎把鉞則休屠款塞太尉抗旌則名王麀角聲教所漸
浹靈虵之都威令所行通燭龍之外開庠建序布濩於
成均正俗移風氛氲於司樂虛納十亂引諒直之規廣
闢四門宏招賢之德青衿知擊壤之性黃髮恣鼓腹之
歡加以鑽味微言研精至道文終所牧之典史倚所讀
之書無輟萬機日且千遍馳郁郁之聲表乾乾之德允
所謂皇哉君哉日用而不知者矣方且告成岱嶽鏤升

中之玉簡昭事梁甫秘禮首之金繩而文王明夷事倅
往冊黃帝橋山痛深前典萬有淪傷三辰掩曜人祇軫
慕山海含悲慟切陟方哀深遏密煩冤荼毒貫切心髓
風樹不靜陟岵何期思所以欽若九功仰稽七德

勅梁沈約武帝踐祚後與諸州郡勅曰欽惟遂古爰及
近代雖禪代異時而成功一揆豈惟靜民寧亂實由符
運總集故能啟業垂統光宅區夏齊氏邁茲昏詖斯亡
奄及民命蠢蠢倒懸非喻朕大懼四海舟覆二象雲傾

億兆與崑崙並燎縉紳與蘊崇共日永言悽悼發憤經
營推鋒投袂電擊風掃藉上天之靈因熊羆之用德未
半古功侔前列齊民既欽若虞夏高揖萬邦兼以冥符
先著樂推攸在幽顯宅心辭不獲命猥以虛寡君臨萬
國川壑之懷寤寐盈慮方欲昧旦不顯日昃忘勞思與
賢能康濟世道卿擁旌萬里共治是寄當求民瘼留念
獄市威斷以御強猾仁惠以撫貧孤使遠近幽深咸得
其所方虛位欽能懸爵佇効勿令漢代璽書獨行於自

古晉世班條靡用於茲日想加克勉副其側席

令梁任昉齊宣德皇后臨朝荅梁王令曰承固茲謙揖
未膺大典敬復雅旨良有憮然夫至寂難原言象所絕
教思有律感通斯在所以異人者神明同人者用舍王
誕茲上睿對越天行德冠二儀化周羣動生民以來一
人而已但達節宏道每濡跡於中庸神照惟幾不抑心
於鑽仰范宣既讓其下取則况聖圖睿範歌思是歸庶
約雖弘慶賞遂替誠賢者悅義長難進之風不肖者矜

功沮竭力之效勸沮之間所差已遠王何得不暫紆雅
尚允荅天人使朕夜艾以安早朝有預今遣率茲百辟
申薦誠款萬致一塗煩言可略又敦勸梁王令曰夫功
在不賞故庸勲之典蓋闕施倖造物則謝德之塗已冥
要不得不強為之名使銓宰有寄王實天生德齊聖廣
淵重構參辰而九星仰止不易日月而二儀貞觀在昔
晦明隱鱗戢翼博通羣籍而讓齒乎一卷之師劒氣凌
雲而屈跡於萬夫之下辯析天口而似不能言文擅彫

龍而成輒削藁爰在弱冠首膺弓旌客遊梁朝聲華藉
甚隆昌季年勤王始著建武惟新締構斯在功隆賞薄
嘉庸莫酬一馬之田介山之志愈厲六百之秩大樹之
號斯存及擁旄司部代馬不敢南牧推轂樊鄧胡塵罕
嘗夕起惟彼狡童窮凶極虐衣冠泯絕禮樂崩喪既而
鞠旅誓衆言謀王室白羽一麾黃馬底定甲既鱗下車
亦瓦裂致天之屈拱揖羣后豐功厚利無得而稱是以
祥光總至休氣四塞五老遊河飛星入昴元功茂勲若

斯之盛而地狹乎四履勢卑乎九伯帝有惡焉輶軒萃
止令遣率茲百辟人致其誠庶匪席之旨不遠而復又敦
重勸梁王令曰朕聞匹夫好仁義在摩踵君子行道達
斯兼濟未有盡器窮神蘊徽章乎天植高奠中樽覩傾
壘而弗極惟王德冠往初功無與二四時等契兩曜齊
明擬度天行取則乾健而運距艱季道極百王援義而
起一戎大定羅山革草罔不率從用使商庭產慈周闕
樹梓傾宮既散鹿臺靡蓄盛德大業巍巍若此日者事

岐之號爰發帝言殊物備禮率由寡昧雖復雲竿載路
清蹕啟行昭德報功未臻其極而高揖天休遠存克讓
俾予未亡與慙日昃今遣率茲百辟人致誠請庶有感
睿心霈然降志

賤梁任昉為百辟勸進梁王賤曰伏承嘉命佇策明公
逡巡盛禮斯實謙尊之旨未窮遠大之致何者嗣君棄
常自絕宗社國命民生剪為仇讐折棟崩榱罷焉自及
卿士懷脯斲之痛黔首懼比屋之誅明公亮格天之功

拯水火之切再踵日月重綴參辰反龜玉於塗泥濟斯
民於坑岸使夫匹婦童兒羞言伊呂鄉校里塾耻談五
霸位卑乎阿衡地狹於曲阜明公宜祇奉天人允膺大
禮無使後予之歌同彼胥怨兼濟之仁翻為獨善又賤
曰近以朝命蘊崇冒奏丹誠奉披還令未蒙虛受縉紳
顯顯深所未達蓋聞受金於府通人之宏致高蹈海隅
匹夫之小節是以履乘石而周公不以為疑增玉璜而
太公不以為讓况世哲繼軌先德在民經綸草昧歎深

微管加以朱方之役荆河是依班師振旅大造王室雖
復累跡救宋重眦存楚居今觀古曾何足云而惑甚盜
鍾功疑不賞皇天后土不勝其酷是以玉馬駿奔表微
子之去金版出地告龍逢之怨明公據鞍輒哭厲三軍
之志獨居淹涕激義士之心故能使海若登祗磬圖効
祉山戎孤竹束馬景從伐罪弔民匡時靖亂匪叨天功實
勤濡足且明公本自諸生取樂名教道風素論坐鎮雅
俗不習孫吳構茲神武驅盡誅之氓濟必封之俗龜玉

不毀誰之功歟獨為君子將使伊周何地某等不達通
變實有愚誠不任慳欵棘心重謁伏願特膺典策式副
民望

序梁沈約武帝集序曰文思安安欽明所以光宅日月
光華南風所以興詠日角之主出自諸生銳頂之君少
明古學漢高宋武雖闕章句歌大風以還沛好清談於
暮年夫成天地之大功膺樂推之寶運未或不文武兼
資能事斯畢者也我皇誕縱自天生知在御清明內發

疏通外典爰始貴遊篤志經術究淹中之雅旨盡曲臺
之奧義莫不因流極源披條振藻若前疑往滯舊學罕
通而超然直詣妙拔終古善發談端精於持論置壘難
踰摧鋒莫擬有同成誦無假含毫興絕節於高唱振清
辭於蘭畹至於春風秋月送別望歸皇王高宴心期促
賞莫不超挺睿興濬發神衷及登庸厯試辭翰繁蔚賡
記風動表議雲飛彫蟲小藝無累大道懷君人之大德
有事君之小心為下奉上形於辭旨雖密奏忠規遺橐

必削而國謨藩政存者猶多逮乎俯應歸運仰修乾錄
載筆握簡各有司存如綸之旨時或染翰暨於設簾靈
囿愷樂在鎬鹿鳴四牡皇華棠棣之歌伐木採薇出車
杖杜之讌皆詠志摘藻廣命羣臣上與日月爭光下與
鍾石比韻事同觀海義等窺天觀之而不測遊之而不
知者矣竊惟左史記言右史記事君舉必書無論大小
况乎感而後思思而後積積而後滿滿而後言若斯而
已哉謹因事立名隨源編次

梁元帝

梁書曰元帝諱繹字世誠武帝第七子也嗣位三年

表陳沈炯為羣臣勸進梁元帝初表曰蠢爾羯胡遂憑
天邑閭闔受白登之辱象魏致堯城之疑臣聞喪君有
君春秋之茂典以德以長先王之通訓少康則收衆撫
職祀夏所以配天平王則居正東遷宗周所以卜世漢
光以能補不道故景厯重昌中宗以不違羣議故江東
可立天其祚梁必將有主軒轅得姓存者二人高祖五

王代實居長功高九有道濟生民非奉聖明誰嗣下武
日月貞明太陽不可以闕照天地貞觀乾道不可以久
惕寶器存乎至重介石慎於易差黔首豈可以少選無
君宗祏豈可以一日無主又第二表曰紫宸曠位赤縣
無主百靈聳動萬國迴遑雖醒醉相扶同歸景毫或謳
且誦總赴唐郊陛下沈首謗然讓德不嗣臣聞星迴日
薄擊雷鞭電者之謂天岳立川流吐霧蒸雲者之謂地
包天地之混成洞陰陽之不測而以財成萬物者其在

聖人乎故云天地之大德曰生聖人之大寶曰位黃屋
廟堂之下大非獲已所安明鏡四衢之尊蓋由應物取
訓陛下稽古文思英雄特達比以周旦則文王之子方
之放勛則帝摯之季千年旦暮可不在斯庭闕湮亡鐘
鼎淪覆嗣膺景業非陛下而誰豈可使赤眉更立盆子
隗囂託置高廟陛下方復從容高讓用執謙尊展其矯
行偽書証罔正朔見機而作斷可識矣不疑何卜無待
著龜日者公卿失馭禍纏霄極獯羯憑凌奸臣互起師

戎伐穎無處不然勸乎誅晉側足皆爾宗社不墜繫在
聖明今也何時而申帝啟之避凶危若此方陳太伯之
辭國有具臣誰敢奉詔又第三表曰日者百司岳牧仰
祈宸鑒以錫珪之功既歸有道當璧之禮允屬聖明而
優詔謙冲窅然凝貌謳歌載馳是用翹首楚人固執燠
丹穴以求君周民樂歸越岐山而事主漢王不即位無
以貴功臣光武止蕭王豈謂紹宗廟陛下英威茂畧雄
圖武筭指撝則丹浦不戰顧盼則阪泉自蕩地維絕而

重組天柱傾而更植縱陛下拂衣而遊廣成登弁山而
去東土羣臣安得仰訴萬物何所歸仁况郊祀配天疊
筐禮曠齋宮清廟匏竹不陳豈可久稽衆議有曠曩典
陳徐陵勸進梁元帝表曰臣聞封唐有聖還承帝嚳之
家居代維賢終纂高皇之祚至如金行重作源出東莞
炎運猶昌枝分南頓莫不因時多難俱繼神宗者也陛
下握符執鉞將在御天玉勝珠衡先章元后神祇所命
非惟太室之祥圖書斯歸何止堯門之瑞星躔東井時

破嶠潼雷震南陽初平尋邑宗王啟霸非勞武德之侯
清蹕無虞何事長安之邸正應揚龍旂以饗帝御鳳宸
以承天厯數在躬疇與為讓豈可逡巡固讓方求石戶
之農高謝君臨徒引箕山之客未知上德之不德唯見
聖人之不仁

北齊文宣帝

北齊書曰文宣帝諱洋字子進受禪于後魏在位五年
哀策文北齊邢子才文宣帝哀策文曰皇路啟扉輔戴

弛殞八校案部六卿且引攀屨輅而兩泣仰穹蒼而撫
心悲風發而地駭愁雲興而景沈括王垂範有訓有則
式奉話言光敷令德其辭曰四象更運九天代名通三
以王得一為貞是應玄德實啟蒼精風后之陣師尚之
兵三奇六合七變五成授柯推轂稟律襲行野無完陳
邑少堅城經營四海劬勞百姓芝蓋夕臨羽旄晨映地
不掩瑞天不愛寶既丹其雀又朱其草莫黑已素莫赤
自皓百獸斯蹈五靈載擾甘露瀼瀼青龍矯矯武功已

暢文教未窮方偃烽候銷戟藏弓齊光日月比祚嵩華
而氛祲日下星闇虛中奄捐朝市長棄華戎道宣末命
義闡餘風六綽已散九旗方卷見容衛之虛歸知平生
之日遠同乘雲而永逝異騎龍之更反清笳奏兮野風
急金鼓震兮日光晚千官悲而雨注萬國哀而露泣萬
事同盡百慮俱收劒舄永去衣冠自遊音儀已謝神教
空留知英聲與至德當無絕兮千秋

議北齊邢子才文宣帝謚議曰伏惟聖德光遠神猷弘

大初自登庸民譽所集把尺持刀成務斯在百揆載清
四門唯穆及天眷既屬人謀所歸鳥獸遷情士女革面
敬順天人拱揖羣后處無上之尊居域中之大禮盛樂
修時和歲稔海內有截天下泰然猶憂勞億兆經營四
國同虞舜之巡省若軒轅之靡寧威武紛紜神功四暢
怨西以東化南自北臨瀚海以浴兵登天山而紕馬左
縈右拂疑歌成章方朝百神於太華受萬國於稽嶺升
中增封高拱垂衣而天喪黎庶奄捐四海考妣之慕實

卷十四
被舍生稱天作誅抑唯恒數故以名追實盡物未臻其
美屈道從制一日可以成名

陳武帝

陳書曰武帝諱霸先字興國吳興長城人受禪於梁在
位三年

哀策文陳沈炯武帝哀策文曰望三靈而標目躋九地
而崩心哭仍几之將撤慟祖鬯之虛斟黃屋祲而白日
掩紫極涵而浮雲陰其辭曰悠悠媯水鬱鬱姚墟惟帝

之系在唐作虞正卿之後握此靈符雕雲布族祥星結
樞負茲大鏡未拾遺珠爰初發跡斬蛇鞠旅大定番禺
載戡海渚承釁而運席卷中流王室如燬乃合諸侯負
鉞誓衆釋位同謀俱登涿鹿實斷蚩尤道濟一匡功歸
四履爰總百官訓于天子儻來有運事非獲已翠龜負
字赤雀銜書謳歌適夏禮樂遷虞負宸正位升壇受圖
二儀協序五緯同符門歌麟趾室詠騶虞奉常定日太
卜燭時升中備物方告雍熙天甘玉露地秀金芝休禎

未荅靈貺徒欺吏求穆卜詔絕良醫義蹕失御天街褫
蹕夏采升榮宮車晏出洞閨移凶充庭罷吉閑宵宵之
窮燈去昭昭之遊日歸大暮之不暘降幽宮而長畢巫
咸筮告容成戒期文衛如在葆鐸相悲去畢陌而東顧
望橋山而路遲臣攀龍而尚在魂過沛而何之侍低昂
之靈燾奉寂寂之空帷銅雀沒於脩松平陵隱於深柏
鼗鼓之哀音燎燿火於通夕薤露落而暮日寒玄霜凝
而壟草白銘功德於旗常被徽音於鐘石廻天儀於清

廟祔祖考而來格播茂實與英聲鬱氛氲於宗祐

表陳沈炯為百官勸進陳武帝表曰臣聞春榮秋落四
時所以迭代金行水流五德所以互序昔陶唐告終有
虞氏作漢魏禪讓晉宋以之登庸天有非常之功有非
常之賞能利天下者受天下之利陛下造化之功日用
之德褰裳去之物誰仰訴頃五星夜聚八風通吹豐露
呈甘卿雲舒族白狼遠至素雉朝飛天意顯然靈貺可
覩

陳文帝

陳書曰文帝諱蒨字子華嗣位七年

哀策文陳徐陵文帝哀策文曰容車曉駕幄殿晨張旌
帷具列綈翮成行擗蜃輅於丹陛攀龍帷於紫庭趨過
窮於屏闌拜慟感於明靈東京飛其瑞露北陸賁其祥
星乃詔雲臺之史稽採咸池之曲叶大雅於鳴金同藏
書於羣玉其辭曰若水傳帝薰風御民重光所集世載
于陳赫矣高祖悠哉上昊蟬聯寶胄暉煥郊禋我皇誕

聖膺此家慶道主衢樽神凝懸鏡洛書天表河紀靈命
納揆馳芳賓門流詠稽陰克伐震野勤王毫道增構幽
風會昌言瞻少昊實仗高陽駕彼軫輶清宮未央歡覃
兆庶德洎遐荒穆齊高寢上膳長樂肅肅承顏哀哀薦
酌悼園恭儉章陵謙約大寶崇名無聞改作纂武升歷
遺愛寔繁三湘九派彌氣雲昏力折天柱才傾地門甘
泉夜照細柳朝屯谷魅山鬼橫流塞源赫赫英薈赳赳
雄斷遍行天討無遺神算鬱掃江淮長驅巴漢九夷百

越雷隨風渙北俘昆耶西戡伊軫荷負皇極劬勞庶機
勤民聽政靈食宵衣服貴綈阜風移閭闡唐山罷奏濮
水韜徽訪採狂狷搜敷仄微世感中孚民維大畜外戶
無閉高垣奚築降情儒雅凝懷庠塾御廡為歡臨雍彌
肅禮兼三代樂備九成天資武德地照文明墨履斯在
幪巾自清連珠合璧曜爽流精獸舞時豫禽歌頌平帝
載維遠王靈維大侯雨占風荒中海外憬彼鞮譯咸承
冠帶是曰君臨斯為交泰白環已賁玄珪克慎東河佇

楫北狄思征鉞斧將戒璵珎未鳴星淫去楚日沴悲荆
億兆何疊穹旻遽傾大禹胼胝重華踞腊仰惟勞務同
斯違懌發夢無徵照祈奚益聽茂陵之鐘鼓抱喬陽之
劍舄詭髮髯於宸儀終纏綿於號擗三占以吉四海同
奔列賄天宇崩號帝閤千門啟於閭闔萬乘警於靈輶
槐風悲於輦道松雨思於郊原鑾旂動而虛蹕宿衛靜
而空尊畢陌平夷流山蟠固紀無遷市唐有通樹經白
社之脩塗廻青門之廣路思沛邑以東臨懷周京以西

顧機神不測性道難稱充窮靡寄孺慕奚憑惟封云之
與禪肅玉牒之與金繩揚英聲而永久共日月而俱升

陳宣帝

陳書曰宣帝諱頊字紹世在位十四年

哀策文陳江總陳宣帝哀策文曰望蜃緯而攀標拜龍
敢而慟絕變五統而淒涼迴三辰而慘切感川岳而地
維傾號穹蒼而天柱折千秋茂德萬世鴻名爰詔掌禮
式序英聲其辭曰媯水樞宿姚墟大虹謳歌承厯揖讓

受終重規帝緒踵武王風名山紀迹清廟傳功我后丕
承思宏祖業莅政恭已臨朝凝默煥爛九功歲蕤七德
憲章昭著威靈允塞爰茲發迹天步艱難連華滕衛比
響應韓羽儀戚右軒冕朝端祈膺當璧繇顯大橫延喜
授玉告善飛旌神器有奉性道無名詩頌唐年樂舞姬
日仁聲汪濊武義洋溢理訟總街凝情衢室巡望如禮
幽祗咸秩疆垂叛援闕徼虔劉治兵丹浦獲醜青丘屠
釣且拔管庫方搜如龍駕鼓獻雉焚裘天必呈祥地寧

愛寶神禽奇獸嘉穀靈草屈軼抽階飛黃伏皂綺雲舒
慶珠星照老廣敷丘素宏啟膠庠書林吐馥文囿含鏘
南洽侯衛北暢遐荒殷羅自解周圍無傷金英掩色玉
床弗豫天駟摧鑣王良失御鑄鼎奚益綴衣何處漫漫
幽夜冥冥上仙長違拜日天意祈年寧神卜兆晏駕迴
天銅麟感泣銀海埋田出德陽之廣殿動繁笳之哀轉
渡洛水之浮橋望偃師之近縣背紫陌而未遠隱黃山
而不見鐸啟挽而依依馬嘶風而戀戀平原欲晦落照

將垂鳳蓋飄而水暗鸞蹕聳而山危曳虵旗之舒卷間
翠野之參差鳥哀哀而驚曙松瑟瑟而吟枝異故鄉之
絲竹非舊宅之墳簣掃秋葉而無盡薦春櫻而願知北
邨已謝西陵何有速宿蒼梧便垂仁壽聲合韶濩道宣
戶牖共瀛海而恒流並嵩華而莫朽

藝文類聚卷十四